

Kontuola

ANTZUOLA / Egubakoitza / 2003ko urriaren 10a / 173. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Hirigune Historikoa Birgaitzeko Plan Berezia onartu dute osoko bilkuran

AINTZANE IRIZAR

Herriko hirigune historikoari dagokion plan berezia onartu du urriko osoko bilkuran udalbatzak. Orain, jendaurrean jarriko dute plan berezi hori, nahi duenak alegazioak aurkez ditzan. Iñaki Berasategi arkitekto bergararrak egin du dokumentua.

Arau subsidiarioen berrikuspena aurrera doa eta badirudi laster onartuko duela Foru Aldundiak behin betiko dokumentua. Arau horiek hainbat gune urbanistikotan banatzen dute herria; horietako bat da hirigune historikoa. Gune horixe, hain zuzen ere, arautuko du onartu berri duten planak.

Aurreko asteko egubakoitzean onartu zuten behin-behineko dokumentua; behin hori onartuta, hilabetez jendaurrean jarriko dute plana, nahi duenak alegazioak aurkez ditzan.

Hirigune Historikoa Birgaitzeko Plan Bereziaren helburua da herriaren gune hori babestea eta zaintzea, baina, era berean, baita bertako bizilagunen bizi kalitatea eta eraikinen kalitatea bera hobetzea ere.



Plan berezi horren helburua da hirigune historikoa babestea eta zaintzea.

IRIZPIDE ZEHATZAK

Oso zehatza da plana; irizpide zehatzak markatzen ditu eraikinei eta gai urbanistikoei dago kienez. Bestiak beste, hiriguneko eraikin guztiak banan-banan aztertu dituzte eta bakoitzaren

gaineko irizpideak markatu. Horrela, hainbat kategoriatan banatu dituzte eraikin guztiak: babes berezia behar dutenak, babes ertainekoak, oinarriko babes mailako behar dutenak, ordezkaragarriak edo hirigunea-

rekin bat ez datozenak izan daitezke eraikinak.

Lizarragako hiribidea, Kalebarren, frontoirako bidea, Herriko Plaza, Buztinzuri, Ondarre plaza eta Kalegoi hartzen ditu barne plan bereziak.

ZINEMA

Domekan hasiko dituzte emanaldiak


Etzi, domeka, hasiko dituzte ikasurte honetako film emanaldiak. Olaran etxean izango dira, domekero, 16:30ean. 1,10 euro ordaindu beharko da sarrera.

Sekula baino lehenago hasiko dira aurten emanaldiokin. Aurreko urteotan azaroan hasi izan dira. Aurten, berriz, urriaren hasi eta apirilera arte, domekero, film bat ikusteko aukera izango dugu. Batez ere, herriko neska-mutikoei zuzendutako filmak eskainiko dituzte. Aurreko urteetan bezala, euskarazko ahalik eta

film gehien ekartzea da zinemako arduradunen asmoa. Eta lehendabiziko filma bera euskaraz izango da: *Marco Antonio eta Hong Kong-eko bahiketa*, hain zuzen ere.

Datorren astean, hilak 19, ez da film emanaldirik izango, Nafarroa Oinez jaia dela eta. Hurrengo hilaren 26an izango dugu: *101 Dálmatas II* filma ikusi ahal izango dugu egun horretan.

Azaroaren 2an, berriz, euskarazko beste bat eskainiko digute: *Ametsen lapurra*.



Marco Antonio eta Hong Kong-eko bahiketa filma eskainiko dute etzi, domeka.

LABUR

Jonan Fernandez Elkarriko kideak hitzaldia egingo du

Hirugarren Bake Konferentziaren Gizarte eta Prestakuntza Fasea izenburupean egingo du hitzaldia Elkarriko kide Jonan Fernandezek. Datorren martitzenean, hilak 14, izango da hitzaldia, udaltxeko osoko bilkuren aretoan, 19:30ean. Elkarrik otsailen egindako VII. Batzar Nagusiak erabaki zuen 2004ko martxoko hauteskundeon ondoren abiaraztea III. Bake Konferentzia. Horren gaineko azalpenak emango ditu Jonan Fernandezek.

Webgunea hilaren 18an aurkeztuko dute

Urriaren 18an, zapatua, aurkeztuko dute Udaleko webgunea. Olaranen egingo dute aurkezpen ekitaldia, 12:00etan. Guztiz bukatuta ez zegoen arren, badira hilabete batzuk sarean jarri zutela. www.antzuela.com helbidean aurkituko dugu webgune hori. Horren harira, webgunea aurkeztearekin batera, KZGunearen berri ere emango dute ekitaldi horretan.

Hamabostaldi Kulturalaren barruan, ibilaldia

Urriaren 16an, eguna, egingo dute irteera erretiratuek mairuen eta kristauen arteko gudua gertatu zen Valdejuquerara. Gaur, egubakoitza, eta bihar, zapatua, eman beharko da izena erretiratuen egoitzan, 18:00ak eta 19:00ak bitartean. Bakoitzak 22 euro ordaindu beharko ditu.

Bestalde, hilaren 13an, astelehena, Antzuolako eta Bergarako erretiratuek antolatutako Hamabostaldi Kulturalaren barruan, ibilaldia egingo dute Antzuolatik Bergarara, lehengo trenbidetik. 16:30ean autobusa izango dute Bergarara joateko.

ELKARRIZKETA

JOSE LUIS PADRON/IDAZLEA

"Haurrak beldurra galdu behar dio irakurtzeari, idazteari, sortzeari"

A.
Gaur, egubakoitza, eskolako umeekin egotekoa zen Jose Luis. Antzuolaren gainean idatziz eta marraztuz arratsaldea ondo pasatzeko aukera izango dute neska-mutikoei. Euren irudimena lantzeko aukera paregabea.

Zer egingo duzue herriko umeekin antolatutako tailerrean?


Antzuolako gida oso berezia sortuko dugu. Euren gertueneko inguruneaz daukaten ezagutza, haur ikuspegia eta sormena erabiliko dute bizi diren lekuan irudimenez betetako ibilbideak asmatzeko. Gida horretan, betiere idazlearen eta margolariaren irudimenetik sortzen diren gogoeta, kale, eraikin, pizti, lorategi eta pertsonaia fantastikoak aurkituko ditugu. Antzuola herria hurrelde berri eta ezagutu gabea bezala azalduko diguna.

Zein izan da tailer horren helburua?

Haurren irudimenaren indar guztia sorkuntzaren altzoran biltzea. Ingurunea ikusteko duten modua eta hezkuntza bat egitea. Eta, batez ere, azpimarratzea, sorkuntza lana, pentsamendua eta artista sena lantzea, ez dela hutsaren hurrengoa, ez dela denbora alferrik galtzea. Idaztea edo marraztea, ekintza dibertigarriak ez ezik, amets egiteko modurik errazena ere badirala erakustea, askatasun bideak, mundu eta gizarte berriak erakitzeko oinarri sendo eta tranpa gabek. Haurrak beldurra galdu behar dio irakurtzeari, idazteari, sortzeari.

Marrakiazkiak eta testuak egin dituzte, baina irakurtzen dute?

Haurraren idazteko gogoak pizten bada, irakurleak direlako da. Hasteko, idaztea irakurtzeko modu bat da. Beharbada, irakurtzeko modu liluragarriena. Idaztea nork bere burua irakur-



CONCETTA PROBANZA

"Idaztea irakurtzeko modu bat da, agian, irakurtzeko modu liluragarriena"

tzea da-eta. Zeure oroitzenak, zeure pentsamenduak, zeure beldurrak, zeure gogoak... irakurtzen dituzu. Horregatik, bereak balira bezala irakurtzen ditu haurrak liburuak, heldutasunerako bere bidaiaren nondik norakoak aurkitzen dituelako haiengan.

"Tailerraren helburua da umeen irudimenaren indar guztia sorkuntzaren altzoran biltzea"

Bestalde, gehien irakurtzen den garaia haurtzaroa dela uste dut. Euskal Herrian bakarrik ekoizten den haur literaturazko publikazio kopuruari kasu egitea baino ez dago, eta ohartzea euskal idazle ospetsuenak bereziki zaintzen duten generoa dela hori.

HAURTZAINDEGIA

Hezkuntza Sailarekin batzarra egin dute

AINTZANE IRIZAR

Martitzenean, urriak 7, egin zuten batzarra Herri Ikastetxeko eta Udaleko arduradunek Eusko Jaurlaritzako Hezkuntza Saileko Xabier Otegiarekin, haurtzaindegiaren gaiak berba egiteko.

Otegi sortu berri den Haurreskolak partzuergoaren berri eman zien, eta herriko ordezkariak euren proposamenak eta nahiak azaldu zizkioten Hezkuntza Saileko arduradunari.

Partzuergoaren helburua da haurtzaindegi publikoak ezartzea, umeak zaindu eta hezteko zerbitzua eskainiko dutenak. Partzuergo hori udalek eta Hezkuntza Sailak osatzen dute, eta azken honek du pisu handiena. Lehenengo fasean, 31 udal sartu dira erakunde horretan. Antzuolako Udalak eginga dauka partzuergoaren sartzeko eskaera; Otegi azaldu zenez, laugarren fasean sartu ahal izango da Antzuolako Udala. Horrek esan nahi du datorren urteko irailean hasiko liratekeela proiektua abian jartzeko lanean.

Bestalde, zera azaldu zien: haurtzaindegiaren jartzeko egin

beharreko egokitzapen lanak Udalak finantzatu beharko dituela. Hasiera baten, %40 edo %45 besterik ez zutela ordaindu beharke esan zitzaizkien udalei, baina hori aldatu egin da.

UDALAK INTERES HANDIA DAUKA

Udaleko Hezkuntza batzordeko buru Inigo Ramirez de Okarizek zera adierazi digu: "Proiektua oso interesgarria da herriarendako, eta horren aldeko apustua egingo dugu Udaletik". Bide batez, gogorarazi digu Udalak apustu globala egin duela etxebizitzak eginez, industrialde baten alde lan eginez eta abar. Eta zera gaineratu digu: "Gure nahia da, horrekin guztiarekin batera, bestelako zerbitzuak ere bultzatzea, tartean, haurtzaindegiarena".

Ramirez de Okarizek azaldu digunez, haurtzaindegiaren izango denaren aurreproiektua dagoeneko eginga dago, eta baita gutxi gorabeherako aurrekontu bat ere. Gauzak horrela, Udaleko arduradunen nahia da ahalik eta azkarren abian jartzea zerbitzu hori eta datorren urteko aurrekontuetan sartzeko egokitzapen lanen gastuak.

KIROLA

PARTIDUAK

FUTBOLA

Urriak 11

12:00: Antzuola-Gasteiz (Neskak)

16:30: Antzuola-Lagun Onak (Erreg.)

Urriak 12

12:00: Antzuola-Tolosa (Gazteak)

PILOTA

Urriak 11 (Gipuzkoako Txapelketa)

17:00: Olalde-Andazpe (Kadeteak)

Ondoren: Olalde-Real Soc. (Nag. pal.)

EMAITZAK

FUTBOLA

Ondarroa 3 Antzuola 0 (2. erreg.)

Lazkao 4 Antzuola 0 (Gazteak)

Eibar 25 Antzuola 1 (Neskak)

PILOTA

Gipuzkoako Txapelketa

Olalde-Andazpe (eskuz nag.) . . . 22-18

Hernani-Olalde (eskuz kad.) . . . 9-22

Futbol talde guztiek galdu egin zuten aurreko asteburuan

Gauzak zeharo okertu zitzaizkien aurreko asteburuan herriko futbol taldeei. Denek galdu zuten. Gauzak horrela, erregional mailako taldea hirugarren postuan geratu da. Gazte mailako taldea, berriz, azkeneko postuan dago, jokaturako hiru partiduetatik bat berdindu eta bi galdu ostean. Neskak bederatzigarren postuan daude, jokaturako hiru partiduetatik hirurak galdu ondoren; kadeteak, azkenik, hirugarren daude, partidu bakarra jokatu.

SUKALDEKO ALTZARIAK
Harizki

**MUEBLES
IGEA**

Sukalderako eta bainurako altzariak
Altzari rustikoetan
espezializatuak

DEKORAZIOA
ABAD
PINTURAK
ANTZUOLA
PAPER PINTATUAK

Jose
Gomez
Abad

Errekalde 6, 4-B.
Antzuola
943 76 60 19
943 76 60 43
Faxa:
943 76 60 19

INDUSTRI MANTENIMENDUA

Zurrategi plaza 4, behea. ANTZUOLA. Tel. eta faxa 943 78 71 80